

Kolaborasi akademik UMP-Politeknik pemangkin kerjasama lebih strategik

Oleh: FINNY MOHAMED



Hubungan kerjasama di antara Universiti dengan Politeknik dilihat sebagai satu pelantar dalam membantu negara membekalkan modal insan yang berilmu pengetahuan dan berkemahiran tinggi ke arah melahirkan warga negara berpendapatan tinggi selaras dengan aspirasi negara menjelang tahun 2020. Atas dasar tersebut, UMP telah mewujudkan satu kolaborasi akademik dengan beberapa Politeknik terdiri daripada Politeknik Sultan Mizan Zainal Abidin (PSMZA), Politeknik Sultan Haji Ahmad Shah (POLISAS) dan Politeknik Muadzam Shah.

Perencanaan program kolaborasi ini didokong melalui Memorandum Persefahaman (MoU) yang telah

ditandatangani pada 24 Oktober 2009 yang lalu di antara Jabatan Pengajian Politeknik, Kementerian Pengajian Tinggi Malaysia bersama dengan empat Universiti di bawah Program Rangkaian Universiti Teknikal Malaysia (MTUN) dalam rangka untuk merancang, membangun dan menjalankan program artikulasi program pengajian di Universiti.

Antara program atrikulasi yang telah dikenal pasti adalah kajian mengenai mekanisme pengecualian kredit supaya ianya dapat dilaksanakan secara optimum melalui proses rekabentuk semula dan pemetaan kurikulum di antara Universiti dengan Politeknik. Malahan, pelbagai program

berbentuk bridging juga boleh dirangka bagi memastikan program pengukuhan kepada pelajar lepasan Politeknik bagi kursus Matematik dan Fizik dilaksanakan sebelum pelajar berkenaan menyambung pengajian di Universiti. Di samping itu, program berbentuk motivasi, promosi dan taklimat program akademik serta pembangunan kurikulum secara bersama dilihat sebagai satu pendekatan yang kolektif untuk memangkin semangat kolaborasi yang terjalin ini.

Justeru, melalui perbincangan yang telah diadakan pada 12 April 2011 kesemua Politeknik yang berkenaan telah sepakat dan mengharapkan agar kolaborasi yang terjalin ini dapat direalisasikan melalui persetujuan secara bersama berdasarkan kepada bidang kerjasama yang telah ditetapkan oleh pihak Kementerian Pengajian Tinggi. Kerjasama dengan pihak Politeknik Sultan Mizan Zainal Abidin (PSMZA), Dungun Terengganu yang telah tersedia jalin lebih awal sejak tahun 2010 pula bakal melonjak satu paradigma yang kukuh melalui perjanjian yang akan dimeterai tidak lama lagi. Buat masa ini, proses sumbang saran dan penyelarasan sedang dijalankan untuk memastikan segala perancangan dapat berjalan dengan lancar.

Universiti Malaysia Pahang (UMP) berharap agar kerjasama ini dapat direalisasikan sebagai salah satu pelantar untuk lepasan pelajar Politeknik menjadi feeder kepada program teknologi kejuruteraan yang akan mula ditawarkan oleh UMP mulai tahun 2012 di samping hubungan di antara Universiti dan Politeknik dapat dieratkan lagi. Semoga kerjasama ini akan mewujudkan suasana kerjasama dalam membangunkan infrastruktur intelektual bagi menjana kredibiliti pelajar yang lebih berkualiti untuk meningkatkan sosioekonomi negara di samping memperkasakan lagi pengajian tinggi negara.